

四庫全書

集部

欽定四庫全書

古詩紀卷四十四

明 馮惟訥 撰

晉第十四

陶淵明

字元亮入宋名潛潯陽柴桑人太尉長沙公侃之曾孫少自高趣親老家貧起為州祭酒

不堪吏職解歸躬耕自資隆安中為鎮軍參軍義熙元年遷建威參軍未幾求為彭澤令在縣八十餘日解歸暨入宋終身不仕顏延年誄之謚曰靖節徵士○詩品曰其源出於應璩又協左思風力文體省靜殆無長語篤意高古辭興婉愜每觀其文想其人德世歎其質直至如歡言酌春酒日暮天無雲風華清靡豈直為田家語耶古今隱逸詩人之宗也

停雲

四章 并序  
以下四言

停雲思親友也。罇湛新醪，園列初榮，願言不從，歎息

彌襟。

靄靄停雲，濛濛時雨。八表同昏，平路伊阻。靜寄東軒，春  
醪獨撫。良朋悠邈，搔首延佇。

停雲靄靄，時雨濛濛。八表同昏，平陸成江。有酒有酒，閒  
飲東窓。願言懷人，舟車靡從。

東園之樹，枝條再榮。競用新好，以招余情。人亦有言，日

月于征安得促席說彼平生

翩翩飛鳥息我庭柯歛翮閒止好聲相和豈無他人念  
子實多願言不獲抱恨如何

時運

四章

并序

時運游暮春也春服既成景物斯和偶影獨遊欣慨  
交心

邁邁時運穆穆良朝襲我春服薄言東郊山滌餘靄宇  
曖微霄有風自南翼彼新苗

洋洋平津乃漱乃濯邈邈遐景載欣載矚稱心而言人亦易足揮茲一觴陶然自樂

延目中流悠悠清沂童冠齊業閒詠以歸我愛其靜寤寐交揮但恨殊世邈不可追

斯晨斯夕言息其廬花藥分列林竹翳如清琴橫牀濁酒半壺黃唐莫逮慨獨在予

榮木 四章 并序

榮木念將老也日月推遷已復有夏總角聞道白首

無成

采采榮木結根于茲晨耀其華夕已喪之人生若寄顛  
顛有時靜言孔念中心悵而

采采榮木于茲托根繁華朝起慨暮不存貞脆由人禍  
福無門匪道曷依匪善奚敦

嗟予小子稟茲固陋徂年既流業不增舊志彼弗舍安  
此日富我之懷矣怛焉內疚

先師遺訓余豈云墜四十無聞斯不足畏脂我名車策

我名驥千里雖遥孰敢不至

勸農 六章

悠悠上古厥初生人傲然自足抱朴含真智巧既萌資  
待靡因誰其贍之實賴哲人

哲人伊何時惟后稷贍之伊何實曰播殖舜既躬耕禹  
亦稼穡遠若周典八政始食

熙熙令音猗猗原陸卉木繁榮和風清穆紛紛士女趣

一作趣時競逐桑婦宵征農夫野宿

氣節易過和澤難久冀缺攜儷沮溺結耦相彼賢達猶  
勤壟畝矧伊衆庶曳裾拱手

民生在勤勤則不匱宴安自逸歲暮奚冀儋石不儲饑  
寒交至顧爾儔列能不懷愧

孔耽道德樊須是鄙董樂琴書田園不履若能超然投  
迹高軌敢不歛衽敬讚德美

命子

十章

悠悠我祖爰自陶唐邈為虞賓歷世重光御龍勤夏承



韋翼商穆穆司徒厥族以昌

紛紛戰國漠漠哀周鳳隱于林幽人在丘逸蚪遶雲奔  
鯨駭流天集有漢眷予愍侯

於赫愍侯運當攀龍撫劍夙邁顯茲武功書誓山河啟  
土開封疊疊丞相允迪前蹤

渾渾長源蔚蔚洪柯羣川載導衆條載羅時有語默運  
因隆窳在我中晉業融長沙

桓桓長沙伊勲伊德天子疇我專征南國功遂辭歸臨

寵不忒

一作感

孰謂斯心而近可得

肅矣我祖慎終如始直方二臺惠和千里於皇仁考淡  
焉虛止寄迹風雲寘茲愠喜

嗟予寡陋瞻望弗及顧慙華鬢負影隻立三千之罪無  
後為急我誠念哉呱聞爾泣

卜云嘉日占亦良時名汝曰儼字汝求思溫恭朝夕念  
茲在茲尚想孔伋庶其企而

厲夜生子遽而求火凡百有心奚特于我既見其生實

金匱要略卷之十四  
欲其可人亦有言斯情無假

日居月諸漸免于孩福不虛至禍亦易來夙興夜寐願爾斯才爾之不才亦已焉哉

贈長沙公族祖

四章

并序

長沙公於余為族祖同出大司馬昭穆既遠已為路人經過潯陽臨別贈此

同源分流人易世踈慨然寤歎念茲厥初禮服遂悠歲月眇徂感彼行路眷然躊躇

於穆令族允構斯堂諧氣冬暄映懷圭璋爰采春花載  
警秋霜我曰欽哉實宗之光

伊余云邁在長忘同笑言未久逝焉西東遥遥三湘滔  
滔九江山川阻遠行李時通

何以寫心貽此話言進簣雖微終焉為山敬哉離人臨  
路悽然歎襟或遘音問其先

酬丁柴桑

二章

有客有客爰來爰止秉直司聰于惠百里飡勝如歸聆

善若始

匪惟諧也屢有良由載言載眺以寫我憂放歡一遇既  
醉還休寔欣心期方從一作同我遊

答龐參軍

六章 并序

龐為衛軍參軍從江陵使上都過潯陽見贈

衡門之下有琴有書載彈載詠爰得我娛豈無他好樂  
是幽居朝為灌園夕偃蓬廬

人之所寶尚或未珍不有同好云胡以親我求良友寔

觀懷人懽心孔洽棟宇惟隣

伊余懷人欣德孜孜我有旨酒與汝樂之乃陳好言乃著新詩一日不見如何不思

嘉遊未數誓將離分送爾于路銜觴無欣依依舊楚邈邈西雲之子之遠良話曷聞

昔我云別倉庚載鳴今也遇之雪霰飄零大藩有命作使上京豈忘宴安王事靡寧

慘慘寒日肅肅其風翩彼方舟容裔江中

一作容與沖沖

勗哉

征人在始思終敬茲良辰以保爾躬

歸鳥

四章

翼翼歸鳥晨去于林遠之八表近憩雲岑和風不洽翻  
翻求心顧儔相鳴景庇清陰

翼翼歸鳥載翔載飛雖不懷遊見林情依遇雲頡頏相  
鳴而歸遐路誠悠性愛無遺

翼翼歸鳥馴林徘徊豈思天路欣及舊棲雖無昔侶衆  
聲每諧日夕氣清悠然其懷

翼翼歸鳥戢羽寒條遊不曠林宿則森標晨風清興好

音時交增繳奚施已卷安勞

卷與  
倦同

遊斜川

并序  
以下五言

辛丑歲正月五日天氣澄和風物閒美與二三隣曲

同遊斜川臨長流望曾城魴鯉躍鱗於將夕水鷗乘

和以翻飛彼南阜者名實舊矣不復乃為嗟嘆若夫

曾城傍無依接獨秀中臯遙望靈山有愛嘉名欣對

不足率爾賦詩悲日月之遂往悼吾年之不留各疏



年紀鄉里以記其時日

開歲脩五日吾生行歸休念之動中懷及辰為茲遊氣  
和天惟澄班坐依遠流弱湍馳文魴閒谷矯鳴鷗迴澤  
散游目緬然睇曾丘雖微九重秀顧瞻無匹儔提壺接  
賓侶引滿更獻酬未知從今去當復如此不中觴縱遙  
情忘彼千載憂且極今朝樂明日非所求

示周續之祖企謝景夷三郎

時三人皆  
講禮校書

負病頽簷下終日無一欣藥石有時閒念我意中人相

去不尋常道路邈何因周生述孔業祖謝響然臻道喪  
向千載今朝復斯聞馬隊非講肆校書亦已勤老夫有  
所愛思與爾為隣願言誨諸子從我潁水濱

怨詩楚調示龐主簿鄧治中

龐遵

天道幽且遠鬼神茫昧然結髮念善事僂俛六九

一作五十

年弱冠逢世阻始室喪其偏炎火屢焚如螟蟻恣中田  
風雨縱橫至收歛不盈廛夏日長抱饑寒夜無被眠造  
夕思鷄鳴及晨願烏遷在已亦何怨

一作何怨天

離憂悽目

前吁嗟身後名於我若浮煙慷慨獨悲歌鍾期信為賢

答龐參軍

并序

三復來貺欲罷不能自爾隣曲冬春再交款然良對  
忽成舊游俗諺云數面成親舊況情過此者乎人事  
好乖便當語離楊公所歎豈惟常悲吾抱疾多年不  
復為文本既不豐復老病繼之輒依周孔往復之義  
且為別後相思之資

相知何必舊傾蓋定前言有客賞我趣每每顧林園談

諧無俗調所說聖人篇或有數斗酒閒飲自懽然我寔  
幽居士無復東西緣物新人惟舊弱毫多所宣情通萬  
里外形迹滯江山君其愛體素來會在何年

五月旦作和戴主簿

虛舟縱逸棹回復遂無窮發歲始俛仰星紀奄將中南  
窓罕悴物北林榮且豐神淵寫時雨晨色奏景風既來  
孰不去人理固有終居常待其盡曲肱豈傷冲遷化或  
夷險肆志無穴隆即事如已高何必升華嵩

和劉柴桑

山澤久見招胡事乃躊躇直為親舊故未忍言索居良  
辰入奇懷挈杖還西廬荒塗無歸人時時見廢墟茅茨  
已就治新疇復應畬谷風轉淒薄春醪解饑飢弱女雖  
非男慰情良勝無栖栖世中事歲月共相疎耕織稱其  
用過此奚所須去去百年外身名同翳如

酬劉柴桑

窮居寡人用時忘四運周櫛庭多落葉慨然知己秋新

葵鬱北牖嘉穠養南疇今我不為樂知有來歲不命室  
攜童弱良日登遠游

和郭主簿二首

藹藹堂前林中夏貯清陰凱風因時來回飈開

一作吹

我

襟息交游閑業卧起弄書琴園蔬有餘滋舊穀猶儲今  
營已良有極過足非所欽春秫作美酒酒熟吾自斟弱  
子戲我側學語未成音此事真復樂聊用忘華簪遙遙  
望白雲懷古一何深

和澤周三春清涼素秋節露凝無游氛天高風景澈陵  
岑聳逸峰遙瞻皆奇絕芳菊開林耀青松冠巖列懷此  
貞秀姿卓為霜下傑銜觴念幽人千載撫爾訣檢素不  
獲展厭厭竟良月

贈羊長史

并序

左軍羊長史銜使秦川作此與之

愚生三季後慨然念黃虞得知千載外正

一作上

賴古人

書賢聖留餘跡事事在中都豈忘游心目關河不可踰

九域甫已一逝將理舟輿聞君當先邁負病不獲俱路  
若經商山為我少躊躇多謝綺與角精爽今何如紫芝  
誰復採深谷久應蕪駟馬無貫患貧賤有交娛清謠結  
心曲人乖運見疎擁懷累代下言盡意不舒

歲暮和張常侍

市朝懷舊人驟驥感悲泉明旦非今日歲暮余何言素  
顏歛光潤白髮一已繁濶哉秦穆談旅力豈未愆向夕  
長風起寒雲沒西山冽冽氣遂嚴紛紛飛鳥還民生鮮



常在矧伊愁苦纏屢闕清酤至無以樂當年窮通靡攸  
慮顛賴由化遷撫已有深懷履運增慨然

和胡西曹示顧賊曹

銑賓五月中清朝起南颶不駛亦不遲飄飄吹我衣重  
雲蔽白日間雨紛微微流目視西園曄曄榮紫葵於今  
甚可愛奈何當復哀感物願及時每恨靡所揮悠悠待  
秋稼寥落將賒遲逸想不可淹猖狂獨長悲

癸卯十二月中作與從弟敬遠

寢跡衡門下邈與世相絕顧盼莫誰知荆扉晝常閉

必結

切淒淒歲暮風翳翳經日雪傾耳無希聲在目皓已潔

或作結

勁氣侵襟袖簞瓢謝屢設蕭索空宇中了無一可

悅歷覽千載書時時見遺烈高操非所攀深得固窮節  
平津苟不由栖遲詎為拙寄意一言外茲契誰能別

與殷晉安別

并序

殷先作晉安南府長史掾因居潯陽後作太尉參軍  
移家東下作此以贈

遊好非久長

一作少長

一遇盡殷勤信宿酬清話益復知為

親去歲家南里薄作少時隣負杖肆游從淹留忘宵晨

語默自殊勢亦知當乖分未謂事已及興言在茲春飄

飄西來風悠悠東去雲山川千里外言笑難為因才華

集作良才

不隱世江湖多賤貧脫有經過便念來存故人

於王撫軍座送客

秋日淒且厲百卉具已腓爰以履霜節登高餞將歸寒  
氣冒山澤游雲倏無依洲渚思綿邈風水互乖違瞻夕

欣良讌離言聿云悲晨鳥暮來還懸崖歛餘暉逝止判  
殊路旋駕悵遲遲目送回舟遠情隨萬化遺

始作鎮軍參軍經曲阿作

弱齡寄事外委懷在琴書被褐欣自得屢空常晏如時

來苟冥會宛轡

集作  
婉轡

憩通衢投策命晨裝暫與園田

一作

林疎眇眇孤舟逝綿綿歸思紆我行豈不遙登降

一作  
陟

千里餘目倦川途異心念山澤居望雲慙高鳥臨水愧  
遊魚真想初在襟誰謂形跡拘聊且憑化遷終返班生

廬

庚子歲五月中從都還阻風於規林二首

行行循歸路計日望舊居一欣侍溫顏再喜見友于鼓棹路崎曲指景限西隅江山豈不險歸子念前途凱風負我心戢柁守窮湖高莽眇無界夏木獨森疎誰言客舟遠近瞻百里餘延目識南嶺空歎將焉如

自古歎行役我今始知之山川一何曠巽坎難與期崩浪聒天響長風無息時久遊戀所生如何淹在茲靜念

園林好人間良可辭當年詎有幾縱心復何疑

辛丑歲七月赴假還江陵夜行塗中作

閒居三十載遂與塵事冥詩書敦宿好林園無俗情如  
何捨此去遙遙至南一作西荆叩枻新秋月臨流別友生

涼風起將夕夜景湛虛明昭昭天宇濶晶晶川上平懷  
役不遑寐中宵尚孤征商歌非吾事依依在耦耕投冠  
旋舊墟不為好爵榮一作榮養真衡茅下庶以善自名

乙巳歲三月為建威參軍使都經錢溪

我不踐斯境歲月好已積晨夕看山川事事悉如昔微  
雨洗高林清飈矯矯雲翮眷彼品物存義風都未隔伊余  
何為者勉勵從茲役一形似有制素襟不可易園田日  
夢想安得久離析終懷在歸壑一作舟諒哉宜一作員霜柏

詠二疏

大象轉四時功成者自去借問哀周來幾人得其趣游  
目漢廷中二疏復此舉高嘯返舊居長揖儲君傳餞送  
傾皇朝華軒盈道路離別情所悲餘榮何足顧事勝感

行人賢哉豈常譽厭厭閭里歡所營非近務促席延故  
老揮觴道平素問金終寄心清言曉未悟放意樂餘年  
遑恤身後慮誰云其人亡久而道彌著

詠三良

彈冠乘通津但懼時我遺服勤盡歲月常恐功愈微忠  
情謬獲露遂為君所私出則陪文輿入必侍丹帷箴規  
向已從計議初無虧一朝長逝後願言同此歸厚恩固  
難忘君命安可違臨穴罔惟一作遲疑投義志攸希荆棘



龍高墳黃鳥聲正悲良人不可贖泣然沾我衣

詠荆軻

燕丹善養士志在報強嬴招集百夫良歲暮得荆卿君  
子死知己提劍出燕京素驥鳴廣陌慷慨送我行雄髮  
指危冠猛氣衝長纓飲餞易水上四座列羣英漸離擊  
悲筑宋意唱高聲蕭蕭哀風逝淡淡寒波生商音一作聲

更流涕羽奏壯士驚心知去不歸且有後世名登車何  
時顧飛蓋入秦庭凌厲越萬里逶迤過千城圖窮事自

至豪主正怔營惜哉劍術疎奇功遂不成其人雖已沒  
千載有餘情

桃花源詩

并記

晉太元中武陵人捕魚為業緣溪行忘路之遠近忽  
逢桃花林夾岸數百步中無雜樹芳草鮮美落英繽紛  
漁人甚異之復前行欲窮其林林盡水源便得一  
山山有小口髣髴若有光便捨船從口入初極狹纔  
通人復行數十步豁然開朗土地平曠屋舍儼然有

良田美池桑竹之屬阡陌交通雞犬相聞其中往來  
種作男女衣著悉如外人黃髮垂髻並怡然自樂見  
漁人乃大驚問所從來具答之便要還家設酒殺雞  
作食村中聞有此人咸來問訊自云先世避秦時亂  
率妻子邑人來此絕境不復出焉遂與外人間隔問  
今是何世乃不知有漢無論魏晉此人一一為具言  
所聞皆歎惋餘人各復延至其家皆出酒食停數日  
辭去此中人語云不足為外人道也既出得其船便

扶向路處處誌之及郡下詣太守說如此太守即遣  
人隨其往尋向所誌遂迷不復得路南陽劉子驥高  
尚士也聞之欣然親往未果尋病終後遂無問津者  
嬴氏亂天紀賢者避其世黃綺之商山伊人亦云逝往  
迹浸復湮來逕遂蕪廢相命肆農耕日入從所憩桑竹  
垂餘蔭菽稷隨時藝春蠶收長絲秋熟靡王稅荒路暖  
交通鷄犬互鳴吠俎豆猶古法衣裳無新製童孺縱行  
歌斑白歡游詣草榮識節和木哀知風厲雖無紀歷誌

四時自成歲怡然有餘樂于何勞智慧奇蹤隱五百一  
朝啟神界淳薄既異源旋復還幽蔽借問游方士焉測  
塵囂外願言躡輕風高舉尋吾契

古詩紀卷四十四

欽定四庫全書

古詩紀卷四十五

明 馮惟訥 撰

晉第十五

陶淵明 二

形影神 并序

貴賤賢愚莫不營營以惜生斯惑甚焉故極陳形影之苦言神辨自然以釋之好事君子共取其心焉

形贈影

天地長不沒山川無改時草木得常理霜露榮悴之謂  
人最靈智獨復不如茲適見在世中奄去靡歸期奚覺  
無一人親識豈相思但餘平生物舉目情悽淒我無騰  
化術必爾不復疑願君取吾言得酒莫苟辭

影答形

存生不可言衛生每苦拙誠願游崑華邈然茲道絕與  
子相遇來未嘗異悲悅憩蔭若暫乖止日終不別此同  
既難常黯爾俱時滅身沒名亦盡念之五情熱立善有

遺愛胡可不自竭酒云能消憂方此詎不劣

神釋

大鈞無私力萬物自森著人為三才中豈不以我故與  
君雖異物生而相依附結托善惡同安得不相與三皇  
大聖人今復在何處彭祖壽永年欲留不得住老少同  
一死賢愚無復數日醉或能忘將非促齡具立善常所  
欣誰當為汝譽甚念傷吾生正宜委運去縱浪大化中  
不喜亦不懼應盡便須盡無復獨多慮



九日閒居

并序

余閒居愛重九之名秋菊盈園而持醪靡由空服九

華寄懷於言

世短意常多斯人樂久生日月依辰至舉俗愛其名露  
淒暄風息氣澈天象明往燕無遺影來鴈有餘聲酒能  
祛百慮菊為制頽齡如何蓬廬士空視時運傾塵爵恥  
虛疊寒華徒自縈歛襟獨聞謠緬焉起深情棲遲固多  
娛淹留豈無成

歸田園居五首

少無適俗韻性本愛丘山誤落塵網中一去三十年羈  
鳥戀舊林池魚思故淵開荒南野際守拙歸園田方宅  
十餘畝草屋八九間榆柳蔭後園桃李羅堂前曖曖遠  
人村依依墟里煙狗吠深巷中鷄鳴桑樹顛戶庭無塵  
雜虛室有餘閒久在樊籠裡復得返自然

野外罕人事窮巷寡輪鞅白日掩荆扉虛室絕塵想時  
復墟曲中披草共來往相見無雜言但道桑麻長桑麻

日已長我土

一作志誤

日已廣常恐霜霰至零落同草莽

種豆南山下草盛豆苗稀晨興理荒穢帶月荷鋤歸道  
狹草木長夕露沾我衣衣沾不足惜但使願無違

久去山澤游浪莽林野娛試攜子姪輩披榛步荒墟徘徊丘壟間依依昔人居井竈有遺處桑竹殘朽株借問  
採薪者此人皆焉如薪者向我言死沒無復餘一世異  
朝市此語真不虛人生似幻化終當歸空無

悵恨獨策還崎嶇歷榛曲山澗清且淺遇以濯吾足漉

我新熟酒隻鷄招近局

一作屬

日入室中闇荆薪代明燭

懽來苦夕短已復至天旭

乞食

饑來驅我去不知竟何之行行至斯里叩門拙言辭主

人解余意遺贈副虛期

一作豈  
虛來

談諧終日夕觴至輒傾

卮

一作杯

情欣新知懽言詠遂賦詩感子漂母惠愧我非

韓才銜戢知何謝冥報以相貽

諸人共游周家墓柏下

今日天氣佳清吹與鳴彈感彼柏下人安得不為懽清  
歌散新聲綠酒開芳顏未知明日事余襟良已殫

連雨獨飲

運生會歸盡終古謂之然世間有松喬於今定何間故  
老贈余酒乃言飲得仙試酌百情遠重觴忽忘天天豈  
去此哉一作天際  
去此幾任真無所先雲鶴有奇翼八表須臾

還顧我抱茲獨倏俛四十年形骸久已化心在復何言

移居二首

昔欲居南村非為卜其宅聞多素心人樂與數晨夕懷  
此頗有年今日從茲役弊廬何必廣取足蔽牀席鄰曲  
時時來抗言談在昔奇文共欣賞疑義相與析

春秋多佳日登高賦新詩過門更相呼有酒斟酌之農  
務各自歸閒暇輒相思相思則披衣言笑無厭時此理  
將不勝無為忽去茲衣食當須紀力耕不吾欺

癸卯歲始春懷古田舍二首

在昔聞南畝當年竟未踐屢空既有人春興豈自免風

晨裝吾駕啓塗情已緬鳥弄懽新節冷風送餘善寒竹  
被荒蹊地為罕人遠是以植杖翁悠然不復返即理愧  
通識所保詎乃淺

先師有遺訓憂道不憂貧瞻望邈難逮轉欲志一作忘常

勤秉耒懽時務解顏勸農人平疇交遠風良苗亦懷新  
雖未量歲功即事多所欣耕種有時息行者無問津日  
入相與歸壺漿勞近鄰長吟掩柴門聊為隴畝民

還舊居

疇昔家上京六載去還歸今日始復來惻愴多所悲阡  
陌不移舊邑屋或時非履歷周故居鄰老罕復遺步步  
尋往跡有處特依依流幻百年中寒暑日相推常恐大  
化盡氣力不及衰撥置且莫念一觴聊可揮

戊申歲六月中遇火

草廬寄窮巷甘以辭華軒正夏長風急林

一作鄰

室頻燒

燔一宅無遺宇舫舟蔭門前迢迢新秋夕亭亭月將圓  
果菜始復生驚鳥尚未還中宵竚遙念一盼周九天總



髮抱孤念奄出四十年形跡憑化往靈府長獨間貞剛  
自有質玉石乃非堅仰想東戶時餘糧宿中田鼓腹無  
所思朝起暮歸眠既已不遇茲且遂灌西一作園

己酉歲九月九日

靡靡秋已夕淒淒風露交蔓草不復榮園木空自凋清  
氣澄餘滓杳然天界高哀蟬無歸響叢雁鳴雲霄萬化  
相尋繹人生豈不勞從古皆有沒念之中心焦何以稱  
我情濁酒且自陶千載非所知聊以永今朝

庚戌歲九月中於西田穫早稻

人生歸有道衣食固其端孰是

一作云

都不營而以求自

安開春理常業歲功聊可觀晨出肆微勤日入負耒

一作

禾還山中饒霜露風氣亦先寒田家豈不苦弗獲辭此

難四體誠乃疲庶無異患千盥濯息簷下斗酒散襟顏  
遥遥沮溺心千載乃相關但願長如此躬耕非所嘆

丙辰歲八月中於下溪田舍穫

溪蘇田切

貧居依稼穡戮力東林隈不言春作苦常恐負所懷司

田眷有秋寄聲與我諧饑者惟初飽束帶候鳴鷄揚櫂  
越平湖汎隨清壑迴爵爵荒山裏猿聲間且哀悲風愛  
靜夜林鳥喜晨開曰余作此來三四星火顏安年逝已  
老其事未云乖遙謝荷篠翁聊得從君栖

飲酒二十首

并序

余閒居寡歡兼此夜已長偶有名酒無夕不飲顧影  
獨盡忽焉復醉既醉之後輒題數句自娛紙墨遂多  
辭無詮次聊命故人書之以為歡笑爾

衰榮無定在彼此更共之邵生瓜田中寧似東陵時寒  
暑有代謝人道每如茲達人解其會一作趣逝將不復疑  
忽與一觴酒日夕懼相持

積善云有報夷叔在西山善惡苟不應何事立空言九  
十行帶索饑寒况當年不賴固窮節百世當誰傳

道喪向千載人人惜其情有酒不肯飲但顧一作願世間

名所以貴我身豈不在一生一生能復幾倏如流電驚  
鼎鼎百年內持此欲何成

栖栖失羣鳥日暮猶獨飛徘徊無定止夜夜聲轉悲厲  
響思清遠去來何依依自值孤生松欽翮遙來歸勁風  
無榮木此蔭獨不哀托身已得所千載不相違

結廬在人境而無車馬喧問君何能爾心遠地自偏採  
菊東籬下悠然見南山山氣日夕佳飛鳥相與還此中  
有真意欲辨已忘言

行止千萬端誰知非與是是非苟相形雷同共譽毀三  
季多此事達士似不爾咄咄俗中惡且當從黃綺

秋菊有佳色裛露掇其英汎此忘憂物遠我遺世情一  
觴雖獨進杯盡壺自傾日入羣動息歸鳥趨林鳴嘯傲  
東軒下聊復得此生

青松在東園衆草沒奇

一作其

姿凝霜殄異類卓然見高

枝連林人不覺獨樹衆乃奇提壺挂

一作撫

寒柯遠望時

復為吾生夢幻間何事繼塵羈

清晨聞叩門倒裳往自開問子為誰歟田父有好懷壺  
漿遠見候疑我與時乖繼縷茅簷下未足為高栖一世

皆尚同願君汨其泥深感父老言稟氣寡所諧紆轡誠  
可學違已詎非迷且共歡此飲吾駕不可回

在昔曾遠遊直至東海隅道路迴且長風波阻中塗此  
行誰使然似為饑所驅傾身營一飽少許便有餘恐此  
非名計息駕歸閒居

顏生稱為仁榮公言有道屢空不獲年長饑至於老雖  
留身後名一生亦枯槁死去何所知稱心固為好客養  
千金軀臨化消其實裸葬何必惡人當解意表

長公曾一仕壯節忽失時杜門不復出終身與世辭仲  
理歸大澤高風始在茲一往便當已何為復狐疑去去  
當奚道世俗久相欺擺落悠悠談請從余所之

有客常同止趣舍邈異境一士長獨醉一夫終年醒  
醉還相笑發言各不領規規一何愚兀傲差若穎寄言

酣中客日沒燭當炳

一作秉

故人賞我趣挈壺相與至班荆坐松下數斟已復醉父  
老雜亂言觴酌失行次不覺知有我安知物為貴悠悠



迷所留酒中有深味

貧居乏人工灌木荒余宅班班有翔鳥寂寂無行跡  
宇宙一何悠人生少至百歲月相催逼鬢髮早已白  
若不妥窮達素抱深可惜

少年罕人事游好在六經行行向不惑淹留遂無成  
竟抱固窮節饑寒飽所更弊廬交悲風荒草沒前庭  
被褐守長夜晨雞不肯鳴孟公不在茲終以翳吾情

幽蘭生前庭含薰待清風清風脫然至見別蕭艾中行

行失故路任道或能通覺悟當念還鳥盡廢良弓

子雲性嗜酒家貧無由得時賴好事人載醪祛所感觴  
來為之盡是諮無不塞有時不肯言豈不在伐國仁者  
用其心何嘗失顯默

疇昔苦長饑投耒去學仕將養不得節凍餒固纏已  
是時向立年志意多所恥遂盡介然分終死歸田里  
冉冉星氣流亭亭復一紀世路廓悠悠楊朱所以止  
雖無揮金事濁酒聊可恃

義農去我久舉世少復真汲汲魯中叟彌縫使其淳鳳  
鳥雖不至禮樂暫得新洙泗輟微響漂流逮狂秦詩書  
復何罪一朝成灰塵區區諸老翁為事誠殷勤如何絕  
世下六籍無一親終日馳車走不見所問津若復不快  
飲空負頭上巾但恨多謬誤君當恕醉人

止酒

居止次城邑逍遙自閒止坐止高蔭下步止草門裏好  
味止園葵大懽止稚子平生不止酒止酒情無喜暮止

不安寢晨止不能起日日欲止之營衛止不理徒知止  
不樂未知止利已始覺止爲善今朝真止矣從此一止  
去將止扶桑浹清顏止宿客奚止千萬祀

述酒

重離照南陸鳴鳥聲相聞秋草雖未黃融風久已分素  
礫晶修渚南嶽無餘雲豫章抗高門重華固靈墳流淚  
抱中歎傾耳聽司晨神州獻嘉粟西靈爲我馴諸梁董  
師旅羊勝喪其身山陽歸下國成名猶不勤卜生善斯

牧安樂不爲君平王去舊京峽中納遺薰雙陵甫云育  
三趾顯奇文王子愛清吹日中翔河汾朱公練九齒閒  
居離世紛峩峩西嶺內偃息常所親天容自永固彭殤  
非等倫

責子

舒儼宣俟雍份端佚通佟凡  
五人舒宣雍端通皆小名也

白髮被兩鬢肌膚不復實雖有五男兒總不好紙筆阿  
舒已二八懶惰故無匹阿宣行志學而不愛文術雍端  
年十三不識六與七通子垂九齡但覓梨與栗天運苟

如此且進杯中物

有會而作

并序

舊穀既沒新穀未登頗為老農而值年災日月尚悠  
為患未已登歲之功既不可希朝夕所資煙火裁通  
旬日已來始念饑乏歲云夕矣慨然永懷今我不述  
後生何聞哉

弱年逢家乏老至

一作歲

更長饑菽麥實所羨孰敢慕甘

肥怒如亞九飯當暑厭寒衣歲月將欲暮如何辛苦悲

常善粥者心深恨蒙袂非嗟來何足吝徒沒空自遺斯  
濫豈彼志固窮夙所歸餒也已矣夫在昔余多師

蜡日

風雪送餘運無妨時已和梅柳夾門植一條有佳花我  
唱爾言得酒中適何多未能明多少章山有奇歌

擬古九首

榮榮牕下蘭密密堂前柳初與君別時不謂行當久出  
門萬里客中道逢嘉友未言心先一作相醉不在接杯酒

蘭枯柳亦衰遂令此言負多謝諸少年相知不忠厚意  
氣傾人命離隔復何有

辭家夙嚴駕當往志

一作至

無終問君今何行非商復非

戎聞有田子春節義為士雄斯人久已死鄉里習其風  
生有高世名既沒傳無窮不學狂馳子直在百年中

仲春遘時雨始雷發東隅衆蟄各潛駭草木縱橫舒翻  
翩新來燕雙雙入我廬先巢故尚在相將還舊居自從  
分別來門庭日荒蕪我心固匪石君情定何如



迢迢百尺樓分明望四荒暮作歸雲宅朝為飛鳥堂山  
河滿目中平原獨茫茫古時功名士慷慨爭此場一旦  
百歲後相與還北邙松柏為人伐高墳互低昂頽基無  
遺主遊魂在何方榮華誠足貴亦復可憐傷

東方有一士被服常不完三旬九遇食十年著一冠辛  
苦無此比常有好看顏我欲觀其人晨去越河關青松  
夾路生白雲宿簷端知我故來意取琴為我彈上絃驚  
別鶴下絃操孤鸞願留就君住從今至歲寒

蒼蒼谷中樹冬夏常如茲年年見霜雪誰謂不知時厭  
聞世上語結友到臨淄稷下多談士指彼決吾疑裝束  
既有日已與家人辭行行停出門還坐更自思不怨道  
里長但畏人我欺萬一不合意永為世笑之伊懷難具  
道為君作此詩

日暮天無雲春風扇微和佳人美清夜達曙酣且歌歌  
竟長歎息持此感人多皎皎

一作明明

雲間月灼灼葉中華

豈無一時好不久當如何

少時

一作年

壯且厲撫劍獨行遊誰言行遊近張掖至幽

州饑食首陽薇渴飲易水流不見相知人惟見古時丘

路邊兩高墳伯牙與莊周此士難再得吾行欲何求

種桑長江邊三年望當採枝條始欲茂忽值山河改柯

葉自摧折根株浮滄海春蠶既無食寒衣欲誰待本不

植高原今日復何悔

雜詩十二首

人生無根蒂飄如陌上塵分散逐風轉此已非常身落

地爲

一作流落成

兄弟何必骨肉親得懽當作樂斗酒聚比

鄰盛年不重來一日難再晨及時當勉勵歲月不待人  
白日淪西河素月出東嶺遙遙萬里輝蕩蕩空中景風  
來入房戶夜中枕席冷氣變悟時易不眠知夕永欲言  
無子和揮杯勸孤影日月擲人去有志不獲騁念此懷  
悲悽終曉不能靜

榮華難久居盛衰不可量昔爲三春萼今作秋蓮房嚴  
霜結野草枯悴未遽央日月有環周我去不再陽眷眷

往昔時憶此斷人腸

丈夫志四海我願不知老親戚共一處子孫還相保觴  
絃肆朝日罇中酒不燥緩帶盡懽娛起晚眠常早熟若  
當世士冰炭滿懷抱百年歸丘壟用此空名道

憶我少壯時無樂自忻豫猛志逸四海騫翮思遠翥荏  
苒歲月頽此心稍已去值歡無復娛每多憂慮氣力  
漸衰損轉覺日不如壑舟無須臾引我不得住前途當  
幾許未知止泊處古人惜寸陰念此使人懼

昔聞長者言掩耳每不喜奈何五十年忽已親此事求  
我盛年歡一毫無復意去去轉欲遠此生豈再值傾家  
時作樂竟此歲月駛有子不留金何用身後置

日月不肯遲四時相催迫寒風拂枯條落葉掩長陌弱  
質與運頽玄鬢早已白素標挿人頭前途漸就窄家爲  
逆旅舍我如當去客去去欲何之南山有舊宅

代耕本非望所業在田桑躬親未曾替寒餒常糟糠豈  
期過滿腹但願飽粳糧御冬足大布麤絺以應陽正爾

不能得哀哉亦可傷人皆盡獲宜拙生失其方理也可  
奈何且爲陶一觴

遙遙從羈役一心處兩端掩淚汎東逝順流追時遽日

沒星與昴勢翳西山巔蕭條隔天涯惆悵念長一作常食

慷慨思南歸路遐無由緣關梁難虧替絕音寄斯篇

閒居執蕩志時駛不可稽驅役無停息軒裳逝東崖沈

陰擬薰麝寒氣激我懷歲月有常御我來淹已彌慷慨

憶綢繆此情久已離荏苒經十載暫爲人所羈庭宇翳

餘木修忽日月虧

我行未云遠回顧慘風涼春燕應節起高飛拂塵梁邊  
鴈悲無所代謝歸北鄉離鵲鳴清池涉暑經秋霜愁人  
難爲辭遙遙春夜長

娟娟松標崖婉變柔童子年始三五間喬柯何可倚養  
色含精氣粲然有心理

詠貧士七首

萬族各有託孤雲獨無依曖曖空中滅何時見餘暉朝



霞開宿霧衆鳥相與飛遲遲出林翮未夕復來歸量力  
守故轍豈不寒與饑知音苟不存已矣何所悲

淒厲歲云暮擁褐曝前軒南圃無遺秀枯條盈北園傾  
壺絕餘瀝闕竈不見烟詩書塞座外日昃不遑研閒居  
非陳厄竊有愠見言何以慰吾懷賴古多此賢

榮叟老帶索欣然方彈琴原生納決履清歌暢高音重  
華去我久貧士世相尋敝襟不掩肘藜羹常乏斟豈忘  
襲輕裘苟得非所欽賜也徒能辯乃不見吾心

安貧守賤者自古有黔婁好爵吾不榮厚饋吾不酬一

旦壽命盡弊服仍

乃一作

不周豈不知其極非道固無憂

從來將千載未復見斯儔朝與仁義生夕死復何求

表安困積雪邈然不可干阮公見錢入卽日棄其官芻

藁有常溫採芎足朝飡豈不實辛苦所懼非饑寒貧富

當交戰道勝無戚顏至德冠邦閭清節映西關

仲蔚愛窮居遶宅生蒿蓬翳然絕交游賦詩頗能工舉

世無知者止有一劉龔此士胡獨然實由罕所同介焉

安其業所樂非窮通人事固以一作已拙聊得長相從

昔在黃子廩彈冠佐名州一朝辭吏歸清貧略難儔年  
饑感仁妻泣涕向我流丈夫雖有志固爲兒女憂惠孫  
一晤歎腴贈竟莫酬誰云固窮難邈哉此前修

讀山海經十三首

孟夏草木長遶屋樹扶疎衆鳥欣有託吾亦愛吾廬旣  
耕亦已種時還讀我書窮巷隔深轍頗迴故人車歡言  
一作然酌春酒摘我園中蔬微雨從東來好風與之俱汎

覽周王傳流觀山海圖俯仰終宇宙不樂復何如

玉臺凌霞秀王母怡妙顏天地共俱生不知幾何年靈  
化無窮已館宇非一山高酣發新謠寧向俗中言

迢遞槐江嶺是謂玄圃丘西南望崑墟光氣難與儔亭  
亭明玕照落落青瑤流恨不及周穆託乘一來游

丹木生何許迺在峯

音密

山陽黃花復朱實食之壽命長

白玉凝素液瑾瑜發奇光豈伊君子寶見重我軒黃

翩翩三青鳥毛色奇可憐朝爲王母使暮歸三危山我

欲因此鳥具向王母言在世無所須惟酒與長年

一作惟願

此長年

逍遙蕪臯上杳然望扶木洪柯百萬尋森散覆暘谷靈人侍丹池朝朝爲日浴神景一登天何幽不見燭

粲粲三珠樹寄生赤水陰亭亭凌風桂八榦共成林靈鳳撫雲舞神鸞調玉音雖非世上寶爰得王母心

自古皆有沒何人得靈長不歿復不老萬歲如平常赤泉給我飲員丘足我糧方與三辰游壽考豈渠央

夸父誕宏志乃與日競走俱至虞淵下似若無勝負神  
力既殊妙傾河焉足有餘迹寄鄧林功竟在身後  
精衛銜微木將以填滄海刑天舞干戚猛志故常在同  
物既無慮化去不復悔徒設在昔心良晨詎可待

巨猾肆威暴欽馭違帝旨寔寐

上音軋  
下音愈

強能變祖江遂

獨歿明明上天鑒爲惡不可履長枯固已劇鷄鶚豈足  
恃

鵠鵠

當作鵠鵠

見城邑其國有放士念彼懷王世當時數來

止青丘有奇鳥自言獨見爾本爲迷者生不以喻君子  
巖巖顯朝市帝者慎用才何以廢共鯨重華爲之來仲  
父獻誠言姜公乃見猜臨沒告饑渴當復何及哉

悲從弟仲德

銜哀過舊宅悲淚應心零借問爲誰悲懷人在九冥禮  
服名羣從恩愛若同生門前執手時何意爾先傾在數  
竟未免爲山不及成慈母沈哀疚二肩纔數齡雙位委  
空館朝夕無哭聲流塵集虛坐宿草旅前庭階除曠遊

迹園林獨餘情翳然乘化去終天不復形遲遲將迴步  
惻惻悲襟盈

擬挽歌辭三首

有生必有死早終非命促昨暮同爲人今旦在鬼錄  
氣散何之枯形寄空木嬌兒索父啼良友撫我哭得失  
不復知是非安能覺千秋萬歲後誰知榮與辱但恨在  
世時飲酒不得足

在昔無酒飲今但湛空觴春醪生浮蟻何時更能嘗  
着



案盈我前親舊哭我傍欲語口無音欲視眼無光昔在

高堂寢今宿荒草鄉

一本有荒草無人眠  
極視正茫茫二句

一朝

一作相送出

門去歸來夜未央

荒草何茫茫白楊亦蕭蕭嚴霜九月中送我出遠郊四

面無人居高墳正焦堯馬爲仰天鳴風爲

一作聲

自蕭條

幽室一已閉千年不復朝千年不復朝賢達將

一作無

奈

何向來相送人各自

一作已

還其家親戚或餘悲他人亦

已歌歿去何所道託體同山阿

聯句

鳴鴈乘風飛去去當何極念彼窮居士如何不歎息

淵


明雖欲騰九萬扶搖竟何力遠招王子喬雲駕庶可飭

惜之顧侶正徘徊離離翔天側霜露豈不切徒愛雙飛

翼循之高柯擢條幹遠眺同天色思絕慶未看徒使生

迷惑

淵明



古詩紀卷四十五

欽定四庫全書

集部

古詩紀卷四十六

詳校官檢討

臣德生

侍讀臣孫球覆勘

總校官知縣

臣楊懋珩

校對官助教

臣卜維吉

謄錄監生

臣繆濂

欽定四庫全書

古詩紀卷四十六

明 馮惟訥 撰

晉第十六

桓玄

字敬道溫之尊子也襲爵南郡公後都督荆司

等起義兵討殺之安帝反正

登荆山

理不孤湛影比有津曾是名岳明秀超鄰器栖荒外命

契響神我之懷矣巾駕飛輪

南林彈

散帶躡良駟揮彈出長林歸翮赴舊栖喬木轉翔禽落  
羽尋絕響屢中轉應心

殷仲文

字仲文陳郡人少有才藻從兄仲堪薦用於  
會稽王道子後從桓玄反玄誅仲文爲劉裕

所殺○詩品曰晉宋之際殆無詩乎義熙中  
以謝益壽殷仲文爲華綺之冠殷不競矣

南州桓公九井作

四運雖鱗次理化各有準獨有清秋日能使高興盡景  
氣多明遠風物自淒紫爽籟驚幽律哀壑叩虛牝歲寒

無早秀浮榮甘夙隕何以標貞脆薄言寄松菌哲匠感  
蕭晨肅此塵外軫廣筵散泛愛逸爵紆勝引伊余樂好  
仁惑祛吝亦泯猥首阿衡朝將貽匈奴哂

送東陽太守

昔人深誠歎臨水送將離如何祖良遊心事孱在斯虛  
亭無留賓東川緬逶迤

闕

謝混

字叔源小字益壽陳郡陽夏人太傅安之孫也  
風華爲江左第一尚孝武帝晉陵公主官至中

領軍尚書左僕射  
以與劉毅善坐誅

遊西池

悟彼蟋蟀唱信此勞者歌有來豈不疾良遊常蹉跎逍  
遙越城肆願言屢經過迴阡被陵闕高臺眺飛霞惠風  
蕩繁囿白雲屯曾阿景旻鳴禽集水木湛清華褰裳順  
蘭沚徙倚引芳柯美人愆歲月遲暮獨如何無爲牽所  
思南榮戒其多

送二王在領軍府集詩

苦哉遠征人將乖萃余室明窓通朝暉絲竹盛蕭瑟樂



酒輟今辰離端起來日

誠族子

南史曰混風格高峻少所交納惟與族子靈運瞻  
晦曜以文義賞會嘗居在烏衣巷故謂之烏衣之  
遊因宴飲之餘爲韻  
語以獎勵靈運等曰

康樂誕通度實有名家韻若加繩染功剖瑩乃瓊瑾靈

運宣明體遠識穎達且沈雋若能去方執穆穆三才順

晦字  
宣明

阿多標獨解弱冠纂華盾質勝誠無文其尚又能

峻曜小通遠懷清悟采采標蘭訊直轡解不躋抑用解

偏吝

瞻字通遠

微子基微尚無倦由慕蘭勿輕一簣少進往

必千仞

微即弘微

數子勉之哉風流由爾振如不犯所知此

外無所慎

靈運等並有誠勵之言惟弘微獨盡褒美

吳隱之

字處默濮陽鄆城人解褐輔國功曹累遷晉陵太守廣州刺史後遷中領軍義熙九年卒

### 酌貪泉賦詩

晉書曰隆安中以隱之爲龍驤將軍廣州刺史未至州二十里地名石門有水曰貪泉飲者懷無厭之欲隱之至泉所酌而飲之因賦此詩及在州清操逾厲

古人云此水一畝懷千金

一作石門有貪泉一畝重千金試使夷齊飲

終當不易心

宗炳

字少文南陽涅陽人性至孝居喪過禮爲鄉閭所稱刺史殷仲堪桓玄並辟主簿不就廬山釋

惠遠結白蓮社其間譽望尤著者號社中十八賢炳其一也○藝文類聚作宋人

登半石山

清晨陟阻崖氣志洞蕭洒嶰谷崩地幽窮石凌天委長  
松列竦肅萬樹巉巖詭上施神農蘿下凝堯時髓

登白鳥山詩

我徂白鳥山因名感昔擬仰升數百仞俯覽眇千里杲

果群木分岌岌衆巒起

闕

王嘉

字子年隴西安陽人清虛服氣不與世人交游石季龍之末至長安潛隱於終南山苻堅累徵

不赴公侯已下咸躬往參詣及姚萇入長安禮嘉如苻堅故事後因事爲萇所害苻登聞嘉歿設壇哭之贈太師謚文定公

歌三首

晉書本傳曰嘉死之日人有壘上見之其所造三章歌識事過皆驗○金陵志曰初王子年著識至安帝果爲劉氏所代

帝諱昌明運當極特申一期延其息諸馬渡江百年中

當值卯金折其鋒

欲知其姓草肅肅穀中最細低頭熟鱗身甲體永興福

南史曰齊太祖高皇帝諱道成姓蕭氏未受命時王子年作此歌按穀中精細者稻也即道也熟猶成也

金刀利刃齊刈之

金刀劉字刈猶剪也

王康琚

以下爵里無考

反招隱詩

小隱隱陵藪大隱隱朝市伯夷竄首陽老聃伏柱史昔在太平時亦有巢居子今雖盛明世能無中林士放神

清雲外絕迹窮山裏鷓鴣先晨鳴哀風迎夜起凝霜凋  
朱顏寒泉傷玉趾周才信衆人偏智任諸已推分得天  
和矯性失至理歸來安所期與物齊終始

招隱

登山招隱士褰裳躡遺蹤華條當園室翠葉代綺牕  
湛方生

廬山神仙詩

序曰尋陽有廬山者盤基彭蠡之西其崇標峻極辰

光隔輝幽澗澄深積清百仞若乃絕阻重險非人跡  
之所遊窈窕沖深常含霞而貯氣真可謂神明之區  
域列真之苑囿矣太元十一年有樵採其陽者于時  
鮮霞寨林傾暉映岫見一沙門披法服獨在巖中俄  
頃振裳揮錫凌崖直上排丹霄而輕舉起九折而一  
指旣白雲之可乘何帝鄉之足遠哉窮目蒼蒼翳然  
滅跡詩曰

吸風玄圃飲露丹霄室宅五岳賓友松喬

後齋詩

解纓復褐辭朝歸藪門不容軒宅不盈畝茂草籠庭滋  
蘭拂牖撫我子姪攜我親友茹彼園蔬飲此春酒開櫺  
攸瞻坐對川阜心焉孰託託心非有素構易抱玄根難  
朽卽之匪遠可以長久

帆入南湖

帆扶  
泛切

彭蠡紀三江廬岳主衆阜白沙淨川路青松蔚巖首此  
水何時流此山何時有人運互推遷茲器獨長久悠悠



宇宙中古今迭先後

還都帆

高岳萬丈峻長湖千里清白沙窮年潔林松冬夏青水  
無暫停流木有千載貞寤言賦新詩忽忘羈客

一作旅情

天晴詩

屏翳寢神轡飛廉收靈扇青天瑩如鏡凝津平

初學作奕如

研落帆脩江渚

初學作湄

悠悠極長眇清氣朗山壑千里遙

相見

諸人共講老子

吾生幸凝湛智浪紛競結流宕失真宗遂之弱喪輟雖  
欲反故鄉埋翳歸途絕滌除非玄風垢心焉能歇大矣  
五千鳴特爲道喪設鑒之誠水鏡塵穢皆朗徹

懷歸謠

辭衡門兮至歡懷生離兮苦辛豈羈旅兮一慨亦代謝  
兮感人四運兮道盡化新兮歲故氛慘慘兮凝晨風悽  
悽兮薄暮雨雪兮交紛重雲兮四布天地兮一色六合

兮同素山木兮摧披津壑兮凝沍感羈旅兮苦心懷桑  
梓兮增慕胡馬兮戀北越烏兮依陽彼禽獸兮尚然况  
君子兮去故鄉望歸塗兮漫漫盼江流兮洋洋思涉路  
兮莫由欲越津兮無梁

秋夜詩

悲九秋之爲節物凋悴而無榮嶺頽鮮而殞綠木傾柯  
而落英履代謝以惆悵覩搖落而興情信臯壤而感人  
樂未畢而哀生秋夜清兮何秋夕之轉長夜悠悠而難

極月皦皦而停光播商氣以清溫扇高風以革涼水激  
波以成連露凝結而爲霜凡有生而必凋情何感而不  
傷苟靈符之未虛孰茲戀之可忘何天懸之難釋思假  
暢之冥方拂塵衿於玄風散近滯於老莊攬逍遙之宏  
維總齊物之大綱同天地於一指等太山於毫芒萬慮  
一時頓縹情累豁焉都忘物我泯然而同體豈復壽夭  
於彭殤

遊園詠

諒茲境之可懷  
究川阜之奇勢  
水窮清以澈  
鑒山鄰天  
而無際  
乘初霽之新景  
登北館以悠矚  
對荆門之孤阜  
傍魚陽之秀岳  
乘夕陽而含詠  
杖輕策以行遊  
襲秋蘭之流芬  
幙長猗之森脩  
任緩步以升降  
歷丘墟而四周  
智無涯而難恬  
性有方而易適  
差一毫而遽乖  
徒理存而事隔  
故羈馬思其華  
林籠雉想其臯  
澤矧流客之歸  
思豈可忘於疇  
昔

蘇彥

七月七日詠織女

火流涼風至少昊協素藏織女思北沚牽牛嘆南陽時  
來嘉慶集整駕巾玉箱瓊珮垂藻蕤霧裾結雲裳金翠  
耀華輜輶輳散流芳釋轡紫微庭解衿碧琳堂歡讌未  
及究晨暉照扶桑仙童唱清道盤螭起騰驤悵悵一宵  
促遲遲別日長

西陵觀濤

洪江一作濤奔逸勢駭浪駕丘山旬隱振宇宙崩殢津雲

連闕

陸沖

雜詩二首

命駕遵長途綿邈途難尋我行亦何艱山川阻且深  
澤無夷軌重巒有層陰零雨淹中路玄雲蔽高岑  
俯悼孤行獸仰歎偏翔禽空谷回闕  
流風漂哀音羈旅淹  
留久悵望愁我心

肆觀野原外放心希太和景嶽造天漢豐林冒重阿清

芬乘風散豔藻映淥波

關

江偉

答賀蜡

正元二年冬臘家君在陳郡余別在國舍不得集會

弟廣平作詩以貽余余答之曰

藝文類聚作晉人然  
晉無正元之號或誤

也

蜡節之會廓焉獨處晨風朝興思我慈父我心懷戀運

首延佇



范廣泉

征虜亭餞王少傅

挂冠東門閭歸褐西唐足結轍塵高衢祖供懸長麓韓  
卿辭輦路疎傳知殆辱素德燭光塵玄軌芳前覺

王齊之

琅邪人廣弘明  
集云晉王齊之

念佛三昧詩四首

妙用在幽

弘明  
作茲

涉有覽無神由昧徹識以照麓積微自

引因功本虛泯彼三觀忘此毫餘

寂漠何始理玄通微融然忘適乃廓靈暉心悠

一作游 緬

域得不踐機用之以冲會之以希

神資天凝圓映朝雲與化而感與物斯群應不以方受  
者自分寂爾淵鏡金水塵紛

慨自一生夙乏惠識託崇淵人庶藉冥力思轉毫功在  
深不測至哉之念主心西極

卞裕

送桓竟陵

翰城將孰寄懷人應斯蒞餞行臨高阜怡衿睦景氣闕

失題

見初學記別部

余弟適東邁眷戀將乖情離別信吾事悽心相纒嬰闕

孔法生

征虜亭祖王少傅

昔人鑒殆辱解紱揚歸舲真感屬神慮高興襲天情闕

張駿

字公庭西涼牧張寔之世子幼而奇偉十歲能屬文後嗣位大都督大將軍涼州牧西平公

薤露行

在晉之二世皇道昧不明主暗無良臣艱一作姦亂起朝

廷七柄失其所權綱喪典刑愚猾窺神器牝雞又晨鳴  
哲婦逞幽虐宗祀一朝傾儲君縊新昌帝執金墉城禍  
釁萌宮掖胡馬動北垆三方風塵起獫狁竊上京義士  
扼素腕感慨懷憤盈誓心蕩衆狄積誠徹昊靈

東門行

選詩外編  
作遊春詩

勾芒御春正衡紀運玉瓊明庶起祥風和氣翕來征慶  
雲陰八極甘雨潤四垓昊天降靈澤朝日耀華精嘉苗

布原野百卉敷時榮鳩鵲與鶯黃間關相和鳴葦萍一作

芙蓉覆靈沼香花揚芳馨春遊誠可樂感此白日傾休否

有終極落葉思本莖臨川悲逝者節變動中情

馬岌

### 題宋纖石壁詩

晉書曰宋纖字令艾敦煌人也隱居酒泉南山不  
應辟命酒泉太守馬岌造焉纖距而不見岌歎曰  
名可聞而身不可見德可仰而形不可覩今  
而後知先生人中之龍也銘詩于石壁曰

丹崖百丈青壁萬尋奇木蒼鬱蔚若鄧林其人如玉維

國之琛室邇人遐實勞我心

張祚時太守楊宣畫織像於閣上出入視之作頌曰

爲枕何石爲漱何流身不可見名不可求

趙整

字文業一名正雒陽清水人或曰濟陰人年十八爲僞秦著作郎後遷至黃門侍郎武威太守

爲人無鬚而瘦有妻妾而無兒時人謂閹然而情度敏達學兼內外後出家事佛更名道整

酒德歌

秦王堅與羣臣飲以極醉爲限整作歌

地列酒泉天垂酒池杜康妙識儀狄先知紂喪殷邦桀傾夏國由此言之前危後則

諷諫詩二首

高僧傳曰正性好幾諫無所迴避符堅末年寵惑鮮卑情於治政正因歌諫曰昔聞孟津河堅動容曰是朕也又歌曰北園有一樹堅笑曰將非趙文業耶

昔聞孟津河千里作一曲此水本自清是誰攪令濁

拾遺

作亂使濁

北園有一

拾遺作棗

樹布葉垂重陰外雖饒棘刺內實有赤

心

諫歌

晉孝武帝寧康二年冬十二月秦王堅與慕容垂夫人段氏同輦遊於後庭宦官趙整歌云云堅改容謝之命夫人下輦

不見雀來入鷺室但見浮雲蔽白日

琴歌

晉書載記曰苻堅分氐戶於諸鎮趙整因侍援琴而歌云云堅笑而不納及敗於姚萇果如整言

阿得脂阿得脂博勞舊父是仇綏尾長翼短不能飛遠

徙種人留鮮卑一旦緩急語阿誰

通鑑作當語誰

苻朗

畧陽臨渭氏人堅之從兄子也性宏達神氣爽邁微拜鎮東將軍青州刺史在任甚有聲績會



晉遣淮陰太守高素伐青州朗遣使詣謝玄於彭  
城求降詔加員外散騎侍郎既至揚州風流邁於  
一時超然自得多所陵  
忽王國寶諧而殺之

### 臨終詩

四大起何因聚散無窮已既適一年中又入一死理冥  
心乘和暢未覺有終始如何箕山夫奄焉處東市曠此  
百年期遠同嵇叔子命也歸自天委化任冥紀

### 失名

### 曲池歌

拾遺在湛方生後  
詩品作湛詩非也

曲池何淡澹芙蓉蔽清源榮華盛壯時見者誰不歡一朝光采落見者不迴顏

古詩紀卷四十六

欽定四庫全書

古詩紀卷四十七

明 馮惟訥 撰

晉第十七

支遁

字道林本姓關氏陳留人或云河東林慮人幼有神理聰明秀徹隱居餘杭山年二十五出家

後入剡於沃洲小嶺立寺行道晉哀帝卽位遣使徵請出都止東安寺講道行留三載上書辭詔許之乃收跡剡山以

晉太和元年終

四月八日讚佛詩

三春迭云謝首夏含朱明祥祥令

一作今

日泰朗朗玄夕

清菩薩彩靈和眇然因化生四王應期來矯掌承玉形  
飛天鼓弱羅騰擢散芝英綠瀾顏龍首縹藥翳流冷芙  
蕖育神葩傾柯獻朝榮芬津霈四境甘露凝玉瓶珍祥  
盈四八玄黃曜紫庭感降非情想恬怕泊無所營玄根  
泯靈府神條秀形名圓光朗東旦金姿艷春精含和總  
八音吐納流芳馨跡隨因溜浪心與太虛冥六度啓窮  
俗八解濯世纓慧澤融無外空同忘化情

詠八日詩三首

大塊揮冥樞昭昭兩儀映萬品誕遊華澄清凝玄聖釋  
迦乘虛會圓神秀機正交養衛恬和靈知溜性命動為  
務下尸寂為無中鏡

真人播神化流淳良有因龍潜堯術邑漂景閭浮瀕佇  
駕三春謝飛轡朱明旬八維披重藹九霄落芳津玄祇  
獻萬舞般遮奏伶倫淳白凝神宇蘭泉渙色身投步三  
才泰揚聲五道泯不為故為貴忘奇故奇神

緬哉玄古思想託因事生相與圖靈器像也像彼形黃

裳羅帕質元服拖緋青神為恭者惠跡為動者行虛堂  
陳藥餌蔚然起奇榮疑似垂噉微我諒作者情於焉遺  
所尚肅心擬太清

五月長齋詩

炎精育仲氣朱離吐凝陽廣漢潛涼變凱風乘和翔令  
月肇清齋德澤潤無疆四部欽嘉期潔已升雲堂靜晏  
和春暉夕惕厲秋霜蕭條詠林澤恬愉味城傍逸容研  
沖積綵綵運宮商匠者握神標乘風吹玄芳淵汪道行

深婉婉化理長疊疊維摩虛德音暢遊方罽牢同牢妙傾  
玄絕致由近藏略略微容簡八言振道綱掇煩練陳句  
臨危折婉章浩若驚飈散回若揮夜光寓言豈所託意  
得筌自喪霑濡妙習融靡靡輕塵亡蕭索情牖頽寥朗  
神軒張誰謂冥津遐一悟可以航願為海遊師擢柁入  
滄浪騰波濟漂客玄歸會道場

八關齋詩三首

并序

間與何驃騎期當為合八關齋以十月二十二日集

同意者在吳縣土山墓下三日清晨為齋始道士白  
衣凡二十四人清和肅穆莫不靜暢至四日朝衆賢  
各去余既樂野室之寂又有掘藥之懷遂便獨住於  
是乃揮手送歸有望路之想靜拱虛房悟外身之真  
登山採藥集巖水之娛遂援筆染翰以慰二三之情  
建意營法齋里仁契朋儔相與期良晨沐浴造閑丘穆  
稭升堂賢皎皎清心修竊窈八闕客無捷自綢繆寂默  
五習真疊疊勵心柔法鼓進三勸激切清訓流悽愴願



宏濟闔堂皆同舟明明玄表聖應此童蒙求存誠夾室  
裏三界讚清休嘉祥歸宰相謁若慶雲浮

三悔啓前朝雙懺暨中夕鳴禽戒朗旦備禮寢玄役蕭  
索庭賓離飄颻隨風適踟躕歧路隅揮手謝內析輕軒  
馳中田習習陵電擊息心投佯步零零振金策引領望  
征人悵悵孤思積咄矣形非我外物固已寂吟詠歸虛  
房守真玩幽蹟雖非一往遊且以閒自釋

靖一潛蓬廬惜惜詠初九廣漠排林篠流颺灑隙牖徙

容遐想逸採藥登崇阜崎嶇升千尋蕭條臨萬畝望山  
樂榮松瞻澤哀素柳解帶長陵坡婆娑清川右冷風解  
煩懷寒泉濯溫手寥寥神氣暢欽若盤春數達度冥三  
才恍惚喪神偶遊觀同隱丘愧無連化肘

詠懷詩五首

傲兀乘尸素日往復月旋弱喪困風波流浪逐物遷中  
路高韻益窈窕欽重玄重玄在何許採真遊理間苟簡  
為我養逍遙使我閒寥亮心神瑩含虛映自然疊疊沈

情去彩彩冲懷鮮跼蹐觀象物未始見牛全毛鱗有所  
貴所貴在忘筌

端坐隣孤影眇罔玄思劬偃蹇收神轡領略綜名書涉

老咄

一作怡

雙玄披莊玩太初詠發清風集觸思皆恬愉

俯欣質文蔚仰悲二匠徂蕭蕭柱下迥寂寂蒙邑虛廓  
矣千載事消液歸空無無矣復何傷萬殊歸一塗道會  
貴冥想罔象掇玄珠悵怏濁水際幾忘映清渠反鑒歸  
澄漠容與含道符心與理理密形與物物踈蕭索人事

去獨與神明居

晞陽熙春圃悠緬歎時往感物思所託蕭條逸韻上尚  
想天台峻髣髴巖階仰冷風灑蘭林管瀨奏清響霄嵯  
育靈謁神䟽含潤長丹沙映翠瀨芳芝曜五爽苔苔重  
岫深寥寥石室朗中有尋化士外身解世網抱朴鎮有  
心揮玄拂無想隗隗形嵯頽回回神宇敞宛轉元造化  
縹緲隣大象願投若人蹤高步振策杖

閑邪託靜室寂寥虛且真逸想流巖阿朦朧望幽人慨

矣玄風濟

一作滋

皎皎離染純時無問道睡行歌將何因

靈溪無驚浪四岳無埃塵余將遊其岵解駕輟飛輪芳

泉代甘醴山果無時珍脩林暢輕跡石宇庇微身崇虛

習本照損無歸昔神曖曖煩情故零零沖氣新近非域

中客遠非世外臣憺怕

一作澹泊

為無德孤哉自有鄰

坤基葩簡秀乾光流易頴神理速不疾道會無陵騁超

超介

一作分

石人握玄攬機領余生一何散分不詔天挺

沈無冥到韻變不揚蔚炳冉冉年往逡悠悠化期永翹

首希玄津想登故未正生途雖十三日已造死境願得

無身道

一作理

高栖沖默靖

述懷詩二首

翔鸞鳴崑崙逸志騰冥虛惚恍迴靈翰息肩棲南岵濯  
足戲流瀾採練銜神䟽高吟漱芳醴頡頏登神梧蕭蕭  
猗一作椅明翩眇眇育清軀長想玄運夷傾首俟靈符河  
清誠可期戢翼令人劬

總肩敦大道弱冠弄雙玄逡巡釋長羅高步尋帝先妙

損階玄老忘懷浪濠川達觀無不可炊累皆自然窮理  
增靈薪昭昭神火傳熙怡安冲漠優游樂靜閑膏腴無  
爽味婉孌非雅絃恢心委形度疊疊隨化遷

詠大德詩

遐想存玄哉冲風一何敞品物緝榮熙生途連惚恍既  
喪大澄真物誘則智蕩昔聞庖丁子揮戈在一作神往

苟能嗣冲音攝生猶指掌乘彼來物間投此默照朗邁

度推卷舒忘懷附罔象交

一作天

樂盈胸襟神會流俯仰

大同羅萬殊蔚若充甸網寄旅海漚鄉委化同天壤

詠禪思道人并序

孫長樂作道士坐禪之像并而讚之可謂因俯對以  
寄誠心求參焉於衡輓圖巖林之絕勢想伊人在  
茲余精其制作美其嘉文不能默已聊著詩一首以  
繼於左

雲岑竦太荒落落英岳布迴壑佇蘭泉秀嶺攢嘉樹蔚  
蒼微遊禽崢嶸絕蹊路中有冲希子端坐摹一作摩太素



自強敏天行弱志慾無欲音喻玉質凌風霜淒淒屬清趣

指心契寒松綢繆諒歲暮會衷兩息間綿綿進禪務投  
一滅官知攝二由神遇承蜩累危九累十亦凝注懸想  
元氣地研幾革蘼慮冥懷夷震驚怕然肆幽度曾空攀  
六淨空同浪七住逝虛乘有來永為有待馭

詠利城山居

五嶽盤神基四瀆涌蕩津動求目方智默守標靜仁苟  
不宴出處託好有常因尋元存終古洞往想逸民玉潔

箕巖下金聲瀨沂濱捲華藏紛霧振褐拂埃塵跡從尺  
蠅屈道與騰龍伸峻無單豹伐分非首陽真長嘯歸林  
嶺瀟灑任陶鈞

鳩羅摩什

此云童壽天竺人秦苻堅遣其將呂光伐龜茲致之會堅為姚萇所害什留光所光

死姚興乃西破呂隆迎致什待以國師之禮後死於長安晉義熙五年也

十喻詩

一喻以喻空空必待此喻借言以會意意盡無會處既  
得出長羅住此無所住若能映斯照萬象無來去

贈沙門法和

高僧傳曰什嘗作頌贈沙門法和凡為十偈辭旨皆爾

心山育明德流薰萬由延哀鸞孤桐上清音徹九天

惠遠

鴈門樓煩人本姓賈氏年二十一遇釋道安以為師研求法藏高悟冥蹟襄陽既沒振錫南遊

結宇匡廬自年六十不復出山年八十三而終

廬山東林雜詩一作遊廬山

崇巖吐清氣幽岫棲神跡希聲奏群籟響出山溜滴有

客獨冥遊徑然忘所適揮手撫雲門靈關安足闢流一作

留心叩玄局感至理弗隔孰是騰九霄不奮冲天嗣妙  
同趣自均一悟超三益

報羅什偈一首

本端竟何從起滅有無際一微涉動境成此顏山勢惑  
相更相乘觸理自生滯因緣雖無主開途非一世時無  
悟宗匠誰謂握玄契末問尚悠悠相與期暮歲

廬山諸道人

遊石門詩并序

石門在精舍南十餘里一名障山基連大嶺體絕衆  
阜闢三泉之會並立而開流傾巖玄映其上蒙形表  
於自然故因以為名此雖廬山之一隅實斯地之奇  
觀皆傳之於舊俗而未覩者衆將由懸瀨險峻人獸  
迹絕逕回曲阜路阻行難故罕經焉釋法師以隆安  
四年仲春之月因詠山水遂杖錫而遊于時交徒同  
趣三十餘人咸拂衣晨征悵然增興雖林壑幽邃而  
開塗競進雖乘危履石並以所悅為安既至則援木

尋葛厯險窮嵯猿臂相引僅乃造極於是擁勝倚巖  
詳觀其下始知七嶺之美蘊竒於此雙闕對峙其前  
重巖映帶其後巒阜周廻以為障崇巖四營而開宇  
其中則有石臺石池宮館之象觸類之形致可樂也  
清泉分流而合注淥淵鏡淨於天池丈石發彩煥若  
披面檉松芳草蔚然光目其為神麗亦已備矣斯日也  
衆情奔悅矚覽無厭遊觀未久而天氣屢變霄霧塵集  
則萬象隱形流光廻照則衆山倒影開闔之際狀有靈

馬而不可測也乃其將登則翔禽拂翮鳴猿厲響歸  
雲迴駕想羽人之來儀哀聲相和若玄音之有寄雖  
髣髴猶聞而神以之暢雖樂不期歡而欣以永日當  
其冲豫自得信有味焉而未易言也退而尋之夫崕  
谷之間會物無主應不以情而開興引人致深若此  
豈不以虛明朗其照閒邃篤其情耶並三復斯談猶  
昧然未盡俄而太陽告夕所存已往乃悟幽人之玄  
覽達恒物之大情其為神趣豈山水而已哉於是徘徊

徊崇嶺流目四矚九江如帶邱阜成垤因此而推形  
有巨細智亦宜然廼喟然嘆宇宙雖遐古今一契靈  
鷺邈矣荒途日隔不有哲人風跡誰存應深悟遠慨  
焉長懷各欣一遇之同歡感良辰之難再情發於中  
遂共詠之云爾

超興非有本理感興自生忽聞石門遊竒唱發幽情褰  
裳思雲駕望岵想曾城馳步乘長巖不覺質有輕矯首  
登靈闕眇若凌太清端坐運虛輪轉彼玄中經神仙同



物化未若兩俱冥

廬山諸沙彌

觀化決疑

謀始創大業問道叩玄篇妙唱發幽蒙觀化悟自然觀  
化化已及尋化無間然生皆由化化化化更相纏宛轉  
隨化流漂浪入化淵五道化為海孰為知化仙萬化同  
歸盡離化化乃玄悲哉化中客焉識化表年

史宗

史宗者不知何許人常  
著麻衣世號麻衣道士

詠懷詩

高僧傳曰宗常在廣陵白土塋凭塋謳唱引絃以  
自欣暢得直隨以施人時高平塋祇為江都令聞  
而召來應對機捷無所拘滯博達稽古辨說玄儒  
乃賦詠懷詩一首塋祇知非常人遣還所在遺布

二十正悉  
以乞人

有欲苦不足無欲亦無憂未若清虛者帶索被玄裘浮  
遊一世間汎若不繫舟方當畢塵累栖志老山丘

帛道猷

本姓馮山陰人居若耶山少以篇牘著稱  
性率素好丘壑一吟一詠有濠上之風

陵峯採藥觸興為詩

釋氏古詩題云寄道壹有相招之意高僧傳曰  
猷與道壹經有講筵之過後與一書因贈詩云

連峯數千里脩林帶平津雲過遠山翳風至梗荒榛茅  
茨隱不見鷄鳴知有人閒步踐其徑處處見遺薪始知  
百代下故有上皇民

竺僧度

姓王名晞字  
元宗東莞人

### 答苕華詩

高僧傳曰度少孤獨與母居求同郡楊德慎女女  
字苕華未及成禮苕華父母繼亡度母亦卒度覩世  
代無常乃捨俗出家改名僧度苕華服畢自惟三  
從之義無獨立之道乃與度書并贈詩度答書報

欽定四庫全書

卷一百一十二

古詩紀

十三

詩於是專精佛  
法後不知所終

機運無停住倏忽歲時過  
巨石會當竭芥子豈云多  
良由去不息故令川上嗟  
不聞榮啓期皓首發清歌  
布衣可暖身誰論飾綾羅  
今世雖云樂當奈後生何  
罪福良由已寧云已恤他

苔華

贈竺度

大道自無窮天地長且久  
巨石故叵消芥子亦難數  
人

生一世間飄若風過牖榮華豈不茂日夕就彫朽川上有餘吟日斜思鼓缶清音可娛耳滋味可適口羅紉可飾軀華冠可耀首安事自剪削耽空以害有不道妾區區但令君恤後

張奴

歌一首

高僧傳曰外國名僧佉叱寄名長干寺有張奴者不知何許人不甚見食而常自肥澤冬夏常著單布衣佉叱行見張奴欣然而笑佉叱曰吾東見蔡純南訊馬生北遇王年今欲就杯度乃與子相見

耶張奴乃題  
槐樹為歌曰

濛濛大象內照曜實顯彰何事迷昏子縱惑自招殃樂  
所少人徃苦道若翻囊不有松栢志何用擬風霜閑豫  
紫烟表長歌出昊蒼澄虛無色外應見有緣鄉歲曜毗  
漢后麗辰傅殷王伊余非二仙晦迹之九方亦見流俗  
子觸眼致酸傷略謠觀有念寧曰盡矜章

謝道韞

王凝之妻安西將軍奕之女也聰識有才辨及遭孫恩之難聞夫為賊所害抽刃出門

手殺數人自爾發居會稽家中莫不嚴肅有文才所著詩賦頌誄行于世

登山

峩峩東嶽高秀極沖青天巖中間虛宇寂寞幽以玄非  
工復非匠雲構發自然氣象爾何物遂令我屢遷逝將  
宅斯宇可以盡天年

擬嵇中散詠松

遙望山上松隆冬不能凋願想遊下憩瞻彼萬仞條騰  
躍未能升頓足俟王喬時哉不我與大運所飄颻

咏雪聯句

欽定四庫全書

卷四十七

謝太傅安寒雪日內集與兒女講論文義俄而雪驟公欣然唱韻兄子胡兒及兄女道韞廣歌公大

笑樂

白雪紛紛何所似

謝公

撒鹽空中差可擬

胡兒

未若柳絮因

風起

道韞

桃葉

王獻之妾

答團扇歌三首

樂府以前二首作古辭後一首作王金珠

七寶畫團扇粲爛明月光與郎却暄暑相憶莫相忘

青青林中竹可作白團扇動搖郎玉手因風託方便



團扇復團扇持許自障面憔悴無復理羞與郎相見

團扇郎

手中白團扇淨如秋團月清風任動生嬌聲任意發

謝芳姿

團扇歌二首

古今樂錄曰團扇歌者晉中書令王珣捉白團扇與嫂婢謝芳姿有愛情好甚篤嫂婢撻婢過苦王東亭聞而止之芳姿素善歌嫂令歌一曲當赦之應聲歌云云珣問更問之汝歌何遺芳姿即改云云

白團扇辛苦五流連是郎眼所見

白團扇憔悴非昔容羞與郎相見

劉和妻王氏

正朝詩

稔冉冥機運迅矣四節經太簇應玄律青陽兆初正

傅充妻辛氏


元正詩

元正啓令節嘉慶肇自茲咸奏萬年觴小大同悅熙

陳新塗妻李氏

冬至詩

靈象尋數迴四氣平運散陰律鼓微陽大明啓脩旦感  
與時來興心隨逝化歎式宴集中堂賓客盈朝館



古詩紀卷四十七